

# LAMEPA

**LOMIGA:**

**Novema**  
**Tesema**

**2023**

CONGREGATIONAL CHRISTIAN CHURCH OF AMERICAN SAMOA  
UA TAUNU'U

## ANOTUSI

Filifilia Dr. Leatulagi Fa'alevao FT, Ta'ita'ifono Ekalesia So'ofa'atasi o le Pasefika, 2024-2028	1
Mai le Fa'atonu	2
Lauga o le Kerisimasi	3
“Osiga Feagaiga” Fili Ah Ken FS & EFKAS Ierusalem Fou AS	5
Saprina Te'o: Sui o Tupulaga EFKAS, Fonotele XII Ekalesia So'ofa'atasi o le Pasefika 2023	6
Ulua'i Pesepesega Kerisimasi—Tupulaga Talavou EFKAS 2023	7
Meaalofa Kerisimasi mo fanau: Samaratin Purse—Operation Christmas Child	8
Fa'apaia Maota Pulega Itu'au-Malosi i mea tau i le Atua	9
Olaina o le So'otaga ma le Atua i ala Fa'aleaganuu: T. Hollister FT	10
Tala Pu'upu'u— “O ai le Atua?”	13

## FILIFILIA DR. LEATULAGI FA'ALEVAO FT, TA'ITA'IFONO EKALESLIA SO'OFA'ATASI O LE PASEFIKA, 2024–2028

O Novema 16-23, 2023, na usua ai le Fonotele XII a Ekalesia So'ofa'atasi o le Pasefika (*Pacific Conference of Churches*), i le laumua o Noumea i New Caledonia. I le fa'aiuga o le fonotele, na fai ai le sailiga tofi mo tofiga fou o le Laulaufono e pei ona masani ai, lea na filifilia ai le Susuga i le Faifeau Toeaina ia Dr. Leatulagi Fa'alevao mai le EFKAS, e fai ma Ta'ita'ifono fou mo le 2024-2028.

O Ekalesia So'ofa'atasi o le Pasefika, o se tasi lea o fa'alapotopotoga ua leva ona fai paaga ma le EFKAS auā le fa'alauteleina o le misiona a le Atua i totonu o le Pasefika. O lenei fa'apotopotoga na fanau mai i le ulua'i fonotaga a ta'ita'i o Ekalesia a le Pasefika sa faia i Malua, Samoa, i le 1961; ona usua lea o lona ulua'i fonotele i le 1966 i Lifou, New Caledonia. O le 2007, na usua ai lana Fonotele lona IX i Amerika Samoa, lea na talimalo ai le EFKAS.

I le taimi nei, e silia ma le 50 Ekalesia ma fa'apotopotoga o Ekalesia mai atunuu eseese o le Pasefika e fai ma totino o lenei fa'alapotopotoga. E aofia ai Ekalesia ma fa'apotopotoga o Ekalesia mai Niu Sila, o Ausetalia, o le Atua Kuki, Tahiti, Samoa (EFKS, Metotisi Samoa), Amerika Samoa (EFKAS), Toga, Fiti, Vanuatu, New Caledonia, o le Atua Solomona, Papua Niu Kini, Sitete Feterale o Maikoronesese, o le Atua Masela, Uelese ma Fotuna, Papua Sisifo, Kiripati, Niue, ma Tuvalu.

O le 'au usufono mai le EFKAS sa 'auai i lea fonotele, e aofia ai: Leatulagi Fa'alevao FT ma Nafatali Fa-lealii FS (sui o le Laulaufono o le fonotele), Vagai Fa'alevao FFT (sui Mafutaga Aoao a Tina), Deanne S. Alo FFS (sui Matagaluega Sisifo - Tina), Paulo Lealaitafea FS (sui Matagaluega Tutotonu - Faifeau), ma le tama'itai ia Saprina Te'o (Sui Matagaluega Sasa'e - Tupulaga Talavou). Sa 'auai foi le Susuga i le Peresetene o le Kolisi Fa'afaifeau Kanana Fou, Dr. Moreli Niutoa FS, i lalo o le fa'alapotopotoga o le SPATS.

E silia ma le 200 usufono mai Ekalesia eseese o le Pasefika sa 'auai i lea fa'amoemoe. Sa talimalo ai le Ekalesia Porotesano a Kanaky-New Caledonia, ma fa'aogaina ai le laumua o le Iunivesite o New Caledonia e usua ai le fonotele. O le Laulaufono sa se'ei i le Fonotele XII: o le Ta'ita'ifono, Rev. Dr. Tevita Havea - o le faifeau mai le Ekalesia Uesiliana Sa'oloto i Toga; o le Sui Ta'ita'ifono, Tamalesi Makutu - .... **Fa'aaauu itulau 2**



Newly elected Officers of the Pacific Conference of Churches for 2024-2028: (L-R) Vice Moderator, Rev. Sepiuta Hala'api'api of the Anglican Diocese of Polynesia; Moderator, Rev. Elder Dr. Leatulagi Fa'alevao of the Congregational Christian Church of American Samoa; and General Secretary, Rev. James Bhagwan of the Methodist Church of Fiji.

## Mai le Fa'atonu

Talofa Ekalesia pele EFKAS, mai lava i ona ta'ita'i, le mamalu o le Lauaufono o le Fonotele, o Komiti tumau ma Mafutaga lagolago a le Ekalesia Aoao; o susuga i Feagaiga ma le mamalu o le 'Au Faigaluega tofofi a le Atua; o Afioga i Ti'akono ma le Mafutaga Tinā, se'ia o'o lava i Tupulaga lalovaoa o le EFKAS. **Malo le Folau! Fa'afetai le tautua i le Fe'au ma le Talalelei a le Atua!**

E leai se fiafiaga e sili ona matagofie nai lo se malaga ae taunu'u manuia. E ui lava e i ai nisi o nai o tatou tamā, o tinā, o uso, tuafafine/tuagane, ma fanau pele ua lē aulia mai le fa'ai'uga o lenei tausaga, a o le uiga lava lea o lenei soifuaga. Peita'i ane, ua o'o atu i latou i le Ekalesia “manumalo”, ae tatou te iai pea i le Ekalesia “tauivi”.

O le tasi fa'auigaina o le “LAMEPA”: fai mai, o le “LA” o le *Lagi*; o le “ME” o le *Mesia*; a o le “PA” o le *Paleali'i*. O lona uiga pe a tu'u fa'atasi, “O le *Lagi* o lo'o i ai le *Paleali'i* ua saunia e le *Mesia* mo le Ekalesia.” O le tasi fo'i lea o 'auga o lo'o ogatotonugalemu ai le vaitau o le Kerisimasi, aemaise le auina mai e le Atua o lona Lamepa e tasi e fa'amalamalama ai le lalolagi pogisā. O Iesu o le Pepe o le Kerisimasi; o le Lamepa e tasi a le Atua. Ua taunuu mea uma ia te ia e ala i lona fanau mai i le lalolagi. O le ala fo'i tatou te fa'ai'u ai tausaga uma ma fa'amanatuina le fanau mai o Iesu; ina ia fai ma ogatotonugalemu e fa'ai'u ma to'omaga ai le savaliga umi o le tausaga.

E fa'amanatu mai ai pea le Paleali'i a le Ekalesia fa'atuatua, o lo'o i le *Lagi* lea, ma ua lelei fo'i ona saunia e le *Mesia* valo'ia. Ia tatou lafo ane avega mamafa ma tigā uma o lenei tausaga, ae a le afio mai o le Atua liutino tagata, le Emanuelu ua tu'ua lona mamalu, ae afio mai e mau fa'atasi ma le lalolagi a tagata. O le *lagi* o lo'o iai le *Paleali'i*, ua na'o le *Mesia* tatou te ui atu i ai. **O ia o le LAMEPA o le OLA!**

O le agaga fa'afetai—fa'afetai i le mamalu o le Ekalesia Aoao ona o le amana'iaina o se auunaga fa'atauva'a a lenei ofisa, e ala i galuega tusitusi o le tatou Lamepa, ma le galuega fa'aliliu upu o le tatou Tusi Faitau Aso i lona tausaga o le a mavae atu. O a foi ni fa'aletonu sa i ai ni tusitusiga sa matou saunia, e avatu lava le vaimalu i pu'ega. Ae matou te fa'amoemoe i le Atua aemaise o la outou tatalo, o le a manuia ai galuega o le tausaga fou. Ia fa'amanuia le Atua ... Ma ia tatou maua se Kerisimasi fiafia ma se Tausaga Fou manuia.

Fa'atonu Lamepa, **Etele T. Falealii AFK**

### Fa'auau mai le itulau 1

## Filifilia Dr. Leatulagi Fa'alevao FT, Ta'ita'ifono PCC

....o le Tina Tiakono mai le Ekalesia Metotisi i Fiti; ma le Failautusi Aoao, Rev. James Bhagwan – o le faifeau mai le Ekalesia Metotisi i Fiti.

O le manu lauti o le Fonotele XII, o le “Do Kamo: Ia Liua i tatou e Keriso e fai ma Tagata Fou!” O le upu “Do Kamo,” e afua mai i le aganuu o tagata Kanaky—o tagata moni o le laueleele o New Caledonia—e fa'amamafa ai le taua o le tagata ina ia liua; liua mai le tagata tuai e avea ma tagata fou; liua mai le leaga e avea ma lelei. A o le liua o le tagata e ala i le mafutaga so'ofa'atasi, o le feau tupito lea o le fonotele sa fa'avae ai le talanoaina o mataupu o loo fai ma fa'afitauli i le tele o Ekalesia o le Pasefika, pei o le suiga o le tau ma le afaina o le si'osi'omaga, o le sa'olotoga i tagatanuu e filifili ai, o vevesiga i totonu o aiga, o le puipuia o fanau, ma fa'afitauli feagai ma tupulaga talavou.

O le aso mulimuli o le fonu, na faia ai le palota e saili ai le Lauaufono fou na te ta'ita'ia le mafutaga a Ekalesia So'ofa'atasi o le Pasefika mo le isi 5 tausaga o lumanai, e tau atu i le Fonotele XIII e faia i Fiti i le 2028. E to'a 3 i latou sa fa'atūtū mai mo le tofi o le Ta'ita'ifono ma le Sui Ta'ita'ifono: o Rev. Dr. Tevita Havea – faifeau Ekalesia Uesiliana Sa'oloto i Toga, o loo seei i le nofoa o le Ta'ita'ifono; Rev. Sepiuta Hala'api'api – faifeau tama'ita'i mai le Ekalesia Anekilisi o le Matagaluega Polinisia; ma le Susuga i le Faifeau Toeaina ia Dr. Leatulagi Fa'alevao, mai le Ekalesia Fa'apotopotoga Kerisiano i Amerika Samoa (EFKAS).

E tusa ai ma le Fa'avae, e tatau ona ausia e le tagata le 50%+1 o palota e manumalo ai. I le ta'amilosaga muamua o le palota, na ausia ai e Rev. Dr. Havea le 43% o palota; ausia e Fa'alevao le 38% o palota; a o Rev. Sepiuta na ausia le 19% o palota. Ina ia paleni itupā i luga o le Lauaufono, o le fa'atonuga mai le Fa'avae, afai e tula'i mai se alii i le tofi Ta'ita'ifono, o le Sui Ta'ita'ifono e tatau ona seei ai se tama'ita'i. Afai foi o se tama'ita'i e tula'i mai i le tofi Ta'ita'ifono, o se alii e se'ei i le Sui Ta'ita'ifono. E maulalo le pasene o palota na maua e Rev. Sepiuta i le taamilosaga muamua o le palota. Ae talu ai ua na o ia le sui tama'ita'i, na okomeki ai lona avea ma Sui Ta'ita'ifono. A o le tofi Ta'ita'ifono, na toe faia ai le palota i le va o Rev. Dr. Tevita Havea ma Dr. Leatulagi Fa'alevao FT.

I le taamilosaga lona lua o le palota, na o le 38% o palota sa mafai ona maua e Rev. Dr. Havea; a e 62% na ausia e le Susuga i le Toeaina ia Dr. Leatulagi Fa'alevao; ma manumalo ai Fa'alevao i le tofi o le Ta'ita'i-

fono, mo le 2024-2028. Mo le tofi Failautusi Aoa, na o Rev. James Bhagwan na tauva mo lea tofiga, na okomeki ai lona toe avea ma Failautusi Aoa.

I lana saunoaga e talia ai le finagalo o le Fonotele XII, na saunoa fa'afetai ai Fa'alevao i le fonotele mo lana fa'atofalaiga, ua filifilia ai o ia e fai ma Ta'ita'ifono. I le Gagana Samoa, na fa'apitoa lana fa'afetai i le 'a'uso mai Samoa – le 'au usufono mai le EFKS ma le 'au usufono mai le Metotisi Samoa – mo le lagoonaina o le fa'amoemoe. Na saunoa fa'afetai foi Fa'alevao i le Ta'ita'ifono o le a tu'ua le nofoa, Rev. Dr. Tevita Havea, mo le tele o tausaga sa auauna ma tau-tua ai mo Ekalesia So'ofa'atasi o le Pasefika. Na ta'ua e Fa'alevao i lana saunoga le le faigofie o le tofiga, aemaise le tele o luitau o loo feagai nei ma Ekalesia o le Pasefika, pei o le suiga o le tau ma le afaina o le siosiomaga, o le sa'olotoga i tagatanuu e filifili ai, ma isi fa'afitauli o loo feagai ma Ekalesia i totonu o atunuu o loo galulue ai. A o le mafuta mai o le Agaga o le Atua, fa'atasi ai ma le agaga o le mafutaga so'ofa'atasi o loo mumu fa'aafi pea i totonu o le Pasefika, e leai se mea e faigata i Ekalesia So'ofa'atasi o le Pasefika pe a galulue fa'atasi.

O le Susuga i le Faifeau Toeaina ia Dr. Leatulagi Fa'alevao, e le gata o ia o le Ta'ita'ifono o le EFKAS, a o le tagatanuu muamua lea mai Amerika Samoa ua se'ei i le tofiga o le Ta'ita'ifono o Ekalesia So'ofa'atasi o le Pasefika. E lagona ai le agaga fa'afetai ma le mitamita ona o ia tofiga ua aumaia e le Atua, e fa'ailoa atu ai le EFKAS i le Pasefika ma le lalolagi atoa. Fa'afetai Toeaina fa'aeaea! Fa'afetai EFKAS mo le tapua'iga! Ia tumau pea i le Atua o tofiga le viiga ma le fa'aneetaga, ma ia viia lona suafa i mea sili tatou te faia pea mo la ma Lana galuega.



**Saunia: Tony Hollister FT**  
**Lauga Tusi Faitau Aso - Tesema 25, 2023**

**Tusi Faitau** – Ioane 3:16-21

**Matua** – f.17: *“Auā e lei auina mai e le Atua lona Atalii i le lalolagi ina ia fa’amasino i le lalolagi, a ia fa’aolaina le lalolagi ia te ia ...”*

**Autū** – *“Ua afio mai le malamalama i le lalolagi”*  
*(Light has come into the World)*

### 1. Fanau mai o Iesu ma le malamalama: (Jesus' birth and the Light)

O le feau o lenei Kerisimasi e fesootai ma le malamalama. Amata mai le Aso Sa ua mavae i le mataupu sa fa'amamafaina ai le malamalama. E fa'apena foi lenei Aso Sa i le taeao (12/24), i le fa'amamafa ai o le malamalama i le Upu sa i le amataga. O va'aiga eseese nei o le malamalama o le Atua, i lana Upu na liutino tagata ia Iesu, ma lona fa'amalamalamaina ai o le foafoaga, le lalolagi, aemaise le tagata. O le malamalama foi i le pepe e fanau mai, e tapena ai le ola o tagata fa'atutua, e pei o luitaia ma tatou i o taotu aso. Ia 'a'ua ne'i pei o le nunumi o mea a'o le'i foafoaina. Ia 'a'ua foi ne'i saisaitia pea le ola e le leaga pe a toilalo.

O le malamalama la iinei i le faitauga mai le tusi o Ioane (3:16-21), o le malamalama mai le alofa o le Atua ua fa'aalia i le Atalii e afio ifo i le lalolagi. O le malamalama i le Atalii, o le fa'ailoga o le Atua ma lona malamalama ua fa'aalia i lona liutinotagata i le pepe e fanau mai. E pei foi o le foafoaga na amata, pe na fanau mai i le Upu, sa i ai i le amataga, sa i le Atua, o le Atua foi le Upu, e pei o le fuaitauga i le Ioane 1:1.

E fa'apena foi le amataga o le fa'amalamalamaina o tagata ina ua leaga. E mai le Alo o le Atua ua fa'aalia le lalolagi i lona fanau mai i le ulugalii mai le aiga o Tavita. Fa'apei la o le Alo/Atalii o le Atua ua fa'aalia i le lalolagi e ala i le pepe e fanau mai, e fa'apena foi le fa'amalamalamaina o le lalolagi ua fa'apogisaina e le leaga/agasala. E amata mai le Atua, ae le o le tagata, ona o le tagata e lofia e le leaga.

Tai pei le uiga o le ola pogisa e toe fa'afou e le malamalama, o le toe tapenaina o se fale matagofie ua gasu i le pefu ma le otaota. O lona uiga, o le alofa fa'aola o le Atua fa'aalia i le Alo, o le alofa ia suia ai va'aiga gasu a le pogisa ua oia ai le lalolagi malama-





lama ma le tagata. O le malamalama e pei ona mua'i fausia ai le foafoaga, e pei o le fale matagofie i lona ulua'i fausia ai.

**2. O le galuega tapena mo le malamalama e le o fa'amasinoina, a o le fa'aolaina: (*The restoring of the light is not judging, but saving*)**

E le o le fa'amasinoga, a o le fa'aolaina. O lona uiga, e le o le sailigia pe fa'apefea ona saisaitia le tagata i le pogisa. O sailiga e foliga ai ua ta'ita'iina e le pogisa ua saisaitia ai le tagata ma le foafoaga, le sailiga a le Atua mo le ola fa'amalamalamaina. O le sailiga e pei ua tau fa'amalie le leaga ina ia maua ai le lelei. Ma le isi, o tapenaga o le malamalama, e leai se tulaga o le fa'asala ma fa'atiga o i'uga fa'afaamasinoga.

Peita'i, o le laveai ma fa'aola e pei ona autu ai le Alo/Atalii o le Atua, na fa'aalia i le fanau mai o le pepe o Iesu. O le pepe o le fa'aolataga, e le o se pepe e fa'amasino ina ia fa'asala. O le pepe o le ola fou, a o ia foi o le Atalii o le Atua ua oo mai i le lalolagi. O le pepe e fanau mai, ua fa'aalia ai le Atua i le lalolagi, mo le fa'afouga o le ola i le malamalama o le Atua.

E ui la e le o le fa'amasinoga le autu o le oo mai o le Alo e ala i le pepe e fanau mai, peita'i, ua fa'amasinoina lava le tagata i lona ola le fa'atuatua i le Alo ua oo mai. Tai pei le fesootaiga lea o le fa'aolataga e ala i le fa'atuatua, ma le fa'asala e ala i le fa'amasinoga, o itu e lua o le tupe siliva. O le ulu ma le si'usi'u (*heads and tails*). O le ulu (*heads*), o le fa'aolaina e ala i le fa'atuatua. A o le si'usi'u (*tails*), o le ola fa'amasinoina e tau i le fa'asalaina.

**3. Va'aiga fa'atupesiliva o le fa'aolataga mai le fa'atuatua ma le fa'asala mai le fa'amasinoga: (*Silver dollar perspective of salvation through faith and condemnation through judgment*)**

O le malamalama o le "fa'aolataga mai le fa'atuatua" ma le "fa'asala mai le fa'amasinoina," na fa'amatala e Ioane i le 1:18-19. E fa'apuupuu fa'apea manatu fa'ailoa i fuaiupu nei: a fa'atuatua e le fa'asalaina. Peita'i, a le fa'atuatua e fa'asala.

I se isi fa'aupuga, o le fa'atuatua o le fa'ailoga o le agaga e le pulea e le leaga. O le tagata foi lea ua fa'aolaina. Peita'i, o le le fa'atuatua, o le fa'ailoga o le agaga ua pulea e le leaga. O le tagata foi ua fa'asalaina. E le manaomia se fa'amasinoga, e pei o fa'amasinoga masani ina ua amio leaga le tagata. Peita'i, o loo fa'amasino fa'aleagaga, e pei ona fai ane Ioane 1:19, "O le fa'amasinoga ina oo mai le malamalama i le lalolagi, a o tagata e sili le mana'o i le pouliuli... ona e leaga amio." O lona uiga, o le tagata le fa'atuatua, ua fa'amasino ina ia fa'asalaina, aua e

saisaitia pea e le pouliuli o amioga leaga. Foliga lena o le fa'amasinoina e tau i le fa'asala, e pei o tagata e lalafi i le amioga leaga fa'alilolilo. Lea e maua ai nisi o tagata, tigā le mātilatila o le lē amiotonu o se gaoiga, ae pei lava o le mea sa'o i le tumai ai. Tagata foi e mumusu e talia ma ta'utino lona sese ma leaga, ne'i fa'amasinoina ai. A o va'aiga nei o le ola i le pogisa e le o lilo i le Atua. O tagata ua fa'asili lo latou ola fa'amalie i amioga a le pogisa, ae ua le manatu i le finagalo alofa o le Atua i lagona o isi tagata. Ma le isi, o tagata ua le manatu i le tala lelei i le oo mai o le Alo e ala i le pepe fanau mai. O vaaiga o le ola fa'apogisaina o loo fa'amasinoina ai, ma fa'asalaina ai pea tagata ona o loo fai le amio leaga ma vaega o le ola.

O vaaiga nei o le ola fa'amasinoina i taimi o le fa'apotopotoga tusi iai Ioane, ma o tatou foi taimi. E le fesiliga foi le saisaitia ai pea o le ola i le lumanai, pe a le fa'afouina le ola i le oo mai o le Alo o le Atua, e ala i le fa'atuatua. E pei ai le soifua o le ola pulea e le fa'amasinoina e tau i le fa'asala, ona o tagata e mumusu e fa'ailoa le ola toilalo i le amio leaga.

O le tele o taimi fa'apea, e lafo ai e le tagata le leaga i isi. A o nisi e manatu, ua le alofa mai le Atua. Peita'i, e le o le Atua ua le alofa, a o le tagata ua le alofa i le Atua. Ua le talia le Atua, e i ai e ala i lona Alo ua fanau mai i le pepe o Iesu. Ma o loo ia i pea e ala i le Agaga Paia. O le pogai lea o sailiga ma le ola fa'amalamalamaina, ona o le pulea ai pea o tagata e le pouliuli o le agasala.

Ia avea ai le fa'amanatuina o le oo mai o le Alo o le Atua e ala i le pepe fanau mai o Iesu, ma tapenaga amata o lo tatou fa'afouga i lona malamalama. O le fa'afouga mai le pepe o le fa'aolataga. E le o se pepe e fa'amasino ma fa'asala. Peita'i, e fai ma ala o lo tatou fa'asalaga pe a sili lo tatou mana'o i le pouliuli nai lo le malamalama. O tagata nei e pei o upu a Ioane (f.20), "Aua o latou uma o e fai mea leaga, e inoino latou i le malamalama, e le o mai foi i le malamalama, ne'i fa'ailoa a latou amio." O le fa'ailoga o le tagata, ua iloa le leaga o se amioga. Peita'i, e musu e fa'ailoa ne'i fa'asinomina ai. O tagata e pei ona fa'amatala e Ioane, ua "inoino i le malamalama."

O tagata foi ua fa'amatala i le vaega lua o le fuaiupu, "e le o mai i le malamalama, ne'i fa'ailoa a latou amio." O tagata e pei o upu e fai i le upega masaesae a tautai e le toe maua ai ni i'a, "O le upega ua le tali-fau." Ua le aoga. Peita'i, e toe aoga pe a fonofono, e pei o le "upega e fili i le po ae talatala i le ao" mo faiva.

**4. O lo tatou ola ai i le malamalama ina ua suia o tatou mai le pogisa: (*Life in the light through being transformed from darkness*)**

O le foliga lea fa'aupega fili ma talatala o le ola i le malamalama o le Alo o le Atua ua oo mai e ala i le pepe o Iesu e pei ona autu ai le aso Kerisimasi. O nai fa'amanatu fa'ale-talalelei mai lenei fa'asoa:

- i. O ta ola ofo ia tausisi i mea tonu ma sasa'o, ina ia fai o ta ola fa'aaoga ma vaaiga o le malamalama e tau i le fa'aolaina. Ia fa'amaoni e pei o upu a Ioane 14:21, "A o le ua fa'amaoni ana mea e fai, e sau lava ia i le malamalama, ia fa'aalia ana amio ina ua tataui le Atua."
- ii. Ia loto tetele e ta'utino lo ta vaivai fa'afanau, fa'atupulaga, ma le 'au matutua, ua fa'aseseina i le ola fa'amalie i le tino. Ua pei ai o fesootaiga malamalama fesootaiga mataga i aupega tafailagi. Ua fa'avaleleaina ai mafaufau o nisi i vai ma fua-laau oona, ma pei ai o le pule i le ola o le fofo o fa'afitauli. Peita'i, ua na o se malamalama e pei o le la goto, e goto ai le ola i seoli.
- iii. E ta'utino ai foi lo ta vaivai fa'atama ma tinā, i o ta faiva alofilima mo le tala lelei, mo aiga maopoopo, ma nuu fetausia'i, fa'apea ekalesia fa'amaoni i le Alii. E fa'avaivaia ai foi amioga lililo e mailei ai tofiga aemaise le taotaomia ai o le 'au vaivai, i le atunuu ma le malo, fa'apea le ekalesia.
- iv. O fa'aaliga la o lo ta fa'amaoni i le ola sui, o lo ta loto tetele e talia ma ta'utino le vaivai, ae le o amioga e pei o faiva o Fiti e lililo. O le ta'utino, e tapena ai le ola fa'amalamalamaina mai le pogisa.
- v. Fa'apei ai ona tuu sa'oloto tagata i le mea moni, e pei o lea tofamanino, e fa'apena lo ta tuu sa'oloto ai mai le pogisa o amioga tau i le fa'asalaina, ina ua fai le fa'afouga o le ola e le Alo ua oo mai e ala i le pepe o Iesu, ma vaaiga silisili o tatou ola.
- vi. O va'aiga o le ola ofo lea, e foliga saisaitia ai o tatou ola e pei ona mafatia lo tatou Alii i faiga a le pogisa, fa'apea le au fa'atuatua na muamua ia tatou. Peita'i, e maua ai lo tatou sa'oloto fa'ale-agaga, ma lo ta fa'aeaina i manuia o le ola fa'avavau, i le mafutaga ma le Alo ma le Tama.

O le fa'amanatu ai la o le oo mai o le Alo o le Atua i le pepe e fanau mai, o lo tatou faaolaina e ala i le fa'atuatua. E pei ona fai mai Ioane 1:12-13, "A o i latou uma e talia o ia, ma fa'atuatua i lona suafa, na ia avatu i ai o lea manuia, ia avea i latou ma fanau a le Atua." O i latou, e le o le toto na fanau ai, e le o le mana'o foi o le tino, e le o loto foi o le tagata. A o le Atua lava. O manuia ia e na'o le Atua, e ala i lona Alo na fanau mai o le pepe o Iesu, e maua ai mo lo tatou fa'amalamalamaina i le olataga ua uma na ia saunia. Ia manuia le Kerisimasi.



### OSIGA FEAGAIGA EFKAS IERUSALEMA FOU & FILI AHKEN FS MA LE FALETUA IA I'UGAFA

"O le aso ua faia e le Alii, e tatou te olioli ma fiafia i ai." E taofi le mafaufau e fa'apea se lagona sa i ai i le aso Faraile 27 Oketopa 2023. Aua o le fa'amoemoe ua fa'ataunuu e ala i le sauniga o le osiga feagaiga a le EFKAS Ierusalem Fou, Pulega Tafa o Kanana, Matagaluega Tutotonu, ma lo latou faifeau, le susuga ia Fili AhKen (FS) ma le faletua ia Iuogafa AhKen. O le susuga i le faifeau Tusi Seanoa (FS) i le Pulega Tafa o Kanana, na ia ta'ita'i le sauniga mo le osiga feagaiga i luma o le Atua ma le fa'apotopotoga sa auai. O le Ta'ita'i Fono o le Ekalesia Ierusalem Fou sa molimau i le afea ai o lo latou filifiliga le susuga le Faifeau ia Fili ma le Faletua ia Iuogafa, e avea ma o latou fa'afeagai-ga. Sa ta'ua i le molimau le faigata o le filifiliga, ae ua faigofie lo latou sailiga i se ta'ita'i ona o le tasi o mafaufauga ma loto.

O le susuga i le faifeau ia Geoffery Tagaloa (FS) (EFKAS Tala Lelei o le Faaolataga) na faitauina le Tusi Paia ma fofogaina le Lauga mo se feau fa'amalosi i le Faifeau ma le faletua mo le galuega tau amata a o se feau fo'i mo le ekalesia ma e na molimau i le osi ina o le feagaiga i lea aso. O le susuga i le Faifeau Toeaina ia Ioane Evagelia (Pulega Fagalao) ma le susuga i le Faifeau Toeaina ia Eleasalo Faataa (Pulega Tafa o Kanana) sa fai ma molimau i le taliaina o le susuga Faifeau ma le Faletua e avea ma Faifeagaiga o le Ekalesia Ierusalem Fou. O le susuga i le Faifeau Toeaina ia Eleasalo sa fofogaina le talosaga mo le fa'apaiaina o le feagaiga ua osi i luma o le Atua.

Sa fa'atumulia le fa'amoemoe o le osiga feagaiga i le mamalu o aiga ma uo, e molimau ma fa'amanuia le amataina o le galuega fou a le Faifeau ma le Faletua. Na malaga mamao mai foi le Susuga i le Toeaina ia Nofoga Onesemo mai Ausetalia e molimauina le aso, o le tama fa'aleagaga e fa'asino ia Fili Ah Ken.



**Ms. Saprina Te’o—CCCA’s Youth Rep,  
PCC General Assembly, New Caledonia**

O le tama’ita’i ia Saprina Te’o (ogatotonu o le ata), mai le Ekalesia EFKAS i ‘Auasi, Pulega Saole, Matagaluega Sasa’e; sa fai ma sui o Tupulaga Talavou i le Fonotele XII a Ekalesia Soofa’atasi o le Pasefika sa faia i Noumea, New Caledonia, Novema 16-23, 2023. O se molimau pupuu lea e tusa ai ma le fa’amoemoe sa auai atu ai, i le Gagana Peretania.

On Friday, November 17, 2023, youths from different countries and different denominations, in which we call the Pacific Ecumenical Family, gathered on a bus to go on a 5-hour drive to Do Neva (New Caledonia) Agricultural College for the Youth Pre-Assembly. It was a bus full of youths from New Caledonia, Samoa, Fiji, Tonga, Solomon Island, Marshall Island, New Zealand, Australia, Maohi Nui (Tahiti), Vanuatu, Kiribati, Cook Islands, Papua New Guinea & American Samoa. This bus ride was the start of new friendships and a new family!

As the youths were loading on the bus, I went to sit in the back with a youth from Aotearoa, New Caledonia, and Samoa. On this ride to Do Neva, our Kanaky brother played the guitar while we all sang songs and talked stories until we got to our destination. What was supposed to be a 5-hour drive turned out to be an hour to us because of the jam sessions and all the talking.

Even though we all spoke different languages with many barriers, the youths clicked in an instant. We used sign language to communicate and google to translate when there was Wi-Fi connection. Although we had a language barrier, it didn’t stop any of us from communicating and finding out what the other one wanted. It was hard at first, but with all the guessing we did, it became easier for us to understand what one another was talking about. Honestly, it was like a game of charades until one of us youths found the answer to our sign language.

Another form of communication was through our dancing and singing. The youths would gather around and play the instruments while others danced and sang. Singing songs was how we learned the Kanaky and Fijian language. As for dancing, we all taught a little bit of how we dance to the others, and they learned quickly with most dances being similar. It was beautiful harmonizing songs together and learning different cultural dances.

At Do Neva, we talked about self-determination, ecological stewardship, safe and just churches and *Do Kamo*. There are so many meanings to the word *Do Kamo* but the main meaning the youths used was to renew and find our true authentic identity. On Sunday, November 19, we all got ready to go back. The youths were devastated that we had to leave, but our Elders were waiting for us for the opening of the PCC General Assembly.

Although we always needed a translator, Pastor James said, “no need for translation, I’m sure everyone can feel the spirit of what we’re saying.” As we prayed every day, it was always a different language and for me, Pastor James was right. We didn’t need to translate prayers that were said in native tongues because through God’s grace, we all understood. My favorite memory was when we would pray the Lord’s Prayer altogether in our own language out loud, you can feel the spirit of God in our presence.

The week of the General Assembly, our schedule was wake up at 5-6am to get ready for the day, breakfast at 6-8am, and then the assembly starts at 8:30am and ends at about 8-9pm because of dinner. Even though we had refreshment breaks in between the sessions, it was tiring, but with God by our side we made it through the week. As a youth rep, our day normally ends at around 11pm because we had practice or discussions for our resolutions. The youth presented our preamble and resolutions on Wednesday and God is good because everything went smoothly. ALL GLORY TO GOD for helping us through it all and especially with the great news we brought back home with us, that our Ta’ita’ifono Elder Dr. Fa’alevao, is now the new PCC Moderator.

Lastly, I would like to thank our Ta’ita’ifono, Elder Dr. Fa’alevao, Faletua Toeaina Vagai, Faletua Deanne, Rev. Paulo and especially our Failautusi aoao Rev. Nafatali for being easy on this humble youth rep, and for supporting our youth night while trusting me, Saprina, to explore and be a part of this assembly. All in all, this was a great opportunity, and it was a blessing to be a part of, and for that I thank God.





## Ulua'i Pesepesega Kerisimasi— Tupulaga Talavou EFKAS 2023

O Tesema 13-15, 2023, na fa'ataunuuina ai le Ulua'i Pesepesega Kerisimasi a Tupulaga Talavou EFKAS, sa faia i le Fale o Matātā Eseeese a le Mafutaga Aoa o Tina i le Laumua i Kanana Fou. O lenei fa'amoemoe sa fa'ama'ite e le Komiti o Aoga ma le Ofisa o A'oa'oga Kerisiano, e fai ma sao a le Ekalesia Aoa e fa'amanatu ma fa'ailoa le agaga o le Kerisimasi i totonu o le atunuu.

O le Afioga i le Kovana Sili, Lemanu Peleti Mauga, ma lana masiofo sa fai ma valaaulia fa'apitoa mo lenei fa'amoemoe i lona ulua'i aso. Na saunoa ai le Afioga i le Kovana Sili i le taua o le Kerisimasi mo le atunuu, aemaise mo aiga. Na fa'amanuia foi le Kovana Sili ma momoli alofaaga o le Kerisimasi mai le Malo o Amerika Samoa i le mamalu o le Ekalesia Aoa.

O le Afioga i le Ta'ita'ifono ia Dr. Leatulagi Fa'alevao FT na talifaitau i le saunoga a le Kovana Sili, na ta'ua ai lenei fa'amoemoe "...o se faiva ese, e fa'afetai ai i le Komiti o Aoga e fai ma sui o le Ekalesia aoa ma le laulau a le Fono Tele; fa'afetai foi i le susuga Fa'atonu ma le Ofisa o Aoga Kerisiano a le Ekalesia, ona o lenei fa'amaite lelei, ma lenei polokalama ae a le galuega tala'i ma lona fa'alauteleina, aemaise fo'i se galuega fa'amafanafana a le Ekalesia, ae a le Atunu'u ma ona tagata, ma le lalolagi i lenei vaitau le faigofie. O le mea moni a, e soso'o a le fau ma le fau i le fa'aauuina o pesepesega o le Kerisimasi pei ona tomua e le faigamalo i ana pesepesega, ae tauia ina ia fai se sao a le Ekalesia e ala i pesepesega e momoli ai le feau o le filemu mai le pepe o le kerisimasi mo le atunuu ma le lalolagi, mo i latou o loo feagai ma mafatiaga, o faigata ma puapuaga o lenei vaitau. A o ē foi o loo feagai ma gasegase, e manatua ai le maota gasegase o le atunu'u atoa ai ma le maota Hope House o loo iai le 'au matutua, e manatua ai foi lenei vaitau le aai o sulufaiga o loo sulufai ai a tatou fanau, o tupulaga, o tina, e manatua uma i lenei vaitau. E le pa'i iai a tatou fa'amanuia fa'aletino i ia nofoaga e tele na latou le

mau fa'amanuia uma fa'aletino. A o galuega o pesepesega, o le tatalo lea a le Ekalesia pei ona fa'atinoina i lenei vaitau, e lava lea e pa'i atu i lagona ma finagalo o loo mafatia i lenei vaitau. O lo'o tutupu pea lagona popole ma le atuatuvaile i tagata o le lalolagi i lenei vaitau, ae ia avea pesepesega o le Kerisimasi e vaimaluina ai loto ma finagalo ua afatia ma mafatia; a ia atagia pea le filemu o le pepe o le Kerisimasi ma aumai ai pea fa'amafanafana loloto mo tatou uma. Ia maua ai fo'i i nei pesepesega, e le gata o le filemu pa'i mai, a o le nonofo fealofani ma le fe'oe'oea'i auā se maopoopoga o aiga ma nu'u ma le faigamalo, aemaise o Ekalesia pe a o'o ina logo lenei tala, talalelei o le pa'i mai o le mālū ma le filemu o le Alii e ala i pepe o le Kerisimasi. Tau ina ia fa'amanuia le Atua i 'autalavou uma ua mafai ona 'auai i lenei fa'amoemoe, ia maua le vi'iga o le pepe o le Kerisimasi i la outou galuega."

O lenei fa'amoemoe e tolu aso sa fa'atinoina ai. O le afiafi muamua, Tesema 13, na tatala ai le porokalama i le sauniga lotu sa ta'ita'iina e le Susuga i le Feagaiga ia Semo Tapaleao FS mai le EFKAS Aoloau, a o le Failautusi foi o le Komiti o Aoga. Na tala malae le 'aufaipese a le Ofisa Tutotonu i lea afiafi, ona sosoo lea ma le 'autalavou a Sailele, 'autalavou a Nua & Seetaga, 'autalavou a Aoloau, 'autalavou a Petesa Tai, ae tualuga le afiafi i pesepesega a le 'autalavou mai Amouli. E mafai ona maimoa pesepesega o le afiafi muamua i luga o le upega tafailagi i le tuatusi: <https://www.facebook.com/KVZKTV/videos/941581383996732>.

O le afiafi lona lua, Tesema 14, na tatala i le sauniga lotu sa ta'ita'iina e le Susuga i le Toeaina ia Fouvale Asiata FT mai le EFKAS Matuu & Faganeanea, ona amata lea i pesepesega a le Aoga Tulaga Muamua a Kanana Fou. Na sosoo ai lea ma le 'autalavou a Matuu & Faganeanea, 'autalavou a Futiga, 'autalavou a Iliili, 'autalavou a Aasu, ae tualuga le afiafi e le 'autalavou a Masefau. E mafai foi ona maimoa pesepesega o le afiafi lona lua i luga o le upega tafailagi i le tuatusi: <https://www.facebook.com/KVZKTV/videos/1002005391101654>.

O le afiafi mulimuli, Tesema 15, na tatala i le sauniga lotu sa ta'ita'iina e le Susuga i le Feagaiga ia Alama Solofa FS mai le EFKAS Vailoa, ona amata lea o pesepesega e le Aoga Mauuluga a Kanana Fou. Na sosoo lea ma le 'autalavou a Utulei, 'autalavou a Petesa Uta, 'autalavou a Nuuuli, 'autalavou a Lauili, ae tualuga le afiafi e le 'autalavou a Vailoa. E mafai foi ona maimoa pesepesega o le afiafi mulimuli i luga o le upega tafailagi i le tuatusi: <https://www.facebook.com/KVZKTV/videos/1492242444676933>.

Na fa'aiu pesepesega i le saunoaga a le afioga i le Sui Ta'ita'ifono ia Faaeteete Saifoloi FT, i lona faafetaia

o tapenaga e pei ona iai le fa'amoemoe. Na saunoa le Sui Ta'ita'ifono, "... e le itiiti le tapenaga na feagai ai ma 'aulotu, e silia ma le 50 autalavou na talosaga mai, ae ua filifilia fa'apitoa na o 'autalavou e 18 e fa'afiafia i lenei tausaga; o se tofa na a'e i le Ta'ita'ifono ma le Lauaufono, e tatou te fa'amamalu fa'atasi ma le Malo ma le atunuu, aemaise lava le lalolagi vevesi o loo vatau ina ia tatou maua pea le filemu e pei ona afio mai ai Iesu o le pepe o le Kerisimasi, e aumaia le filemu mo i tatou. O le mea lea e amuia lo outou mamalu susuga i feagaiga ma 'aulotu ma 'autalavou ua filifilia fa'apitoa mo lenei tausaga. O lea ua silamiō, ua silasila ma va'ava'ai, ua malie lava mata e vaai, ua fa'alogo foi ua malilie lava e fa'afofoga i tapenaga eseese i siufofoga, o pesega auā lava le lagiina o viiga e viia ai le afio mai o le pepe o le Kerisimasi; Talofa e, e leai se manuia i le laulauafono ma le ofisa o le Ekalesia, ua na o le tatalo i manuia o i le Atua ia falute mai lagi ina ia manuia pea tapenaga e pei ona iai le fa'amoemoe o lenei tausaga." Saunoa foi le Sui Ta'ita'ifono, "Ua iai se manatu o le a fa'auauina pea lenei fa'amoemoe i le tausaga fou pe a tusa ai ma fuafuaga a le Ekalesia."

afaina i fa'alavelave fa'ale-natura, aemaise o fanau ma tamaiti ua afaina i taua, o fa'ama'i, ma le matelaina. O se tasi o latou porokalama fa'amisiona e ta'ua o le "Operation Christmas Child," latou te saunia ai meaalofa o le Kerisimasi (*shoebox gift*) mo fanau i le va o le 2 tausaga e tau atu i le 11 tausaga le matua. O le porokalama lea sa fa'atino ai le tufaga meaalofa sa faia i Kanana Fou.

O le Susuga i le Faifeau ia Nuuausala Siaosi mai le Ekalesia Porotesano i Apia, o ia lea o le tagata fesoota'i a le fa'alapotopotoga o le Samaritan's Purse i totonu o le Pasefika, ma sa galulue fa'atasi ma le Lauaufono i le fa'atinoga o lenei porokalama i Kanana Fou. E le gata i 'aulotu o le EFKAS, a o le agaga o le Kerisimasi, na tatala ai foi lenei porokalama i tua i 'aulotu uma e i lalo o le fa'amalu o Ekalesia So'ofa'atasi i Amerika Samoa, e aofia ai 'aulotu o le Ekalesia Katoliko, Ekalesia Metotisi Samoa, Ekalesia Nasereta, Ekalesia Aso Fitu tuto'atasi, Ekalesia Iesu i Samoa, Ekalesia Fa'apotopotoga a le Atua, ma isi Ekalesia laiti i totonu o le atunuu na tali mai i le valaaulia.

Sa ave le lisi i tua i faifeau uma o le EFKAS ma isi Ekalesia e pei ona ta'ua i luga, e fa'atumu mai ai le aofa'i o tamaiti i totonu o 'aulotu e i le va o le 2-5 tausaga, o le 6-8 tausaga, ma le 9-11 tausaga. Ina ua maopoopo mai uma lisi, e sili atu ma le 3,000 le aofa'i o tamaiti sa faitauina. Na fa'ailoa le aofa'i i le Susuga ia Nuuausala ma le vaega o le Samaritan Purse, ona auina mai ai lea o meaalofa ua mae'a ona afifi lelei, ma vaevaeina i luga o le lisi o 'aulotu sa auina mai.

O le aso 18 o Tesema na valaaulia ai faifeau uma, fa'atasi ai ma sui ta'i to'a 2 mai i 'aulotu uma sa auina mai o latou lisi, e feiloai ma sui o le Samaritan's Purse sa malaga mai ma faailo mai lo latou folasaga e tusa ai ma lo latou misiona ma meaalofa ua latou saunia. Sa lagona le agaga fiafia i le mamalu o le 'aufaigaluega ma le aofia sa 'auai mai i le misiona a le Samaritan's Purse, e le gata i le porokalama ua auina mai ai meaalofa mo le fanau i le Kerisimasi, ae fa'apea isi fesoasoani ua latou ofo mai mo 'aulotu o loo moomia le fesoasoani. A o le aso 19 na tufatufaina ai meaalofa e 3,000 ma ona tupu. I totonu o nei meaalofa fatigipusa, o lo'o iai meaalofa ese'ese, ae tele lava i meaalofa e aoga mo le a'oa'oina o fanau i tala e uiga ia Iesu.

Sa maua se avanoa o le Lamepa e fa'atalanoaina ai se tasi o Tina mai le Ekalesia GreatLife 684 i Leone sa 'auai i lenei fa'amoemoe. Na fa'asoa mai si Tina i le matagofie o lenei fa'amoemoe, ma fa'afetaia ai le EFKAS i le fa'atinoga o lenei porokalama, aemaise le tatalaina atu o le avanoa i isi Ekalesia o le atunuu, ua matagofie ai le Kerisimasi mo fanau i lenei tausaga.



## Meaalofa Kerisimasi mo fanau: Samaritan's Purse—Operation Christmas Child

O le aso 18 ma le aso 19 o Tesema i le fale ta'alo o le "Taeaoafua o Tupulaga" i Kanana Fou, na fa'atino ai le fa'amoemoe o le tufatufaina o meaalofa Kerisimasi mo fanau o Ekalesia ese'ese o le atunuu. O lenei fa'amoemoe sa mafai ona o se fesootaiga i le va o le Lauaufono ma le fa'alapotopotoga Kerisiano mai Amerika ua ta'ua, o le "Samaritan's Purse." O lea fa'alapotopotoga ua lauiloa i le lalolagi i lana galuega fa'amisiona e fesoasoani ai i atunuu matitiva, i tagata ua





### **Fa'apaia le Maota o le Pulega Itu'au- "Malosi i Mea Tau i le Atua"**

O le aso 27 o Tesema na fa'apa'ia ai le Maota o le Pulega a Itu'aumalosi i mea tau i le Atua, i le laumua o le Ekalesia Aoao i Kanana Fou. Na fa'atumulia le 'aai o le Ekalesia i lea fa'amoemoe. Sa matauina le to'atele o le 'auvalaaulia sa 'auai. E le gata i le Ta'ita'ifono ma le Lauaufono o le fonotele, ae sa malaga mamao mai foi le Afioga i le Ta'ita'ifono o le Komiti a le 'Au Toeaina e 'auai i le fa'amoemoe, le Susuga i le Toeaina ia Falelua Lafitaga. Na 'auai le to'atele o le Komiti a le 'Au Toeaina i Samoa. Ae sa valaaulia foi le Afioga i le Kovana Sili, le Afioga ia Lemanu Peleti Mauga ma lona masiofo; o le Afioga i le Peresetene o le Senate, le tofa ia Tualo Fruean; fa'apea le Afioga i le Fofoga Fetala'i o le Maota o Sui, le tofa ia Savali Talavou Ale; sa fai i latou ma sui o le Malo o Amerika Samoa.

O le Afioga i le Tiakono, le tofa ia Sili Sataua, sa fai ma fofoga o le aso. O le Afioga i le Ta'ita'ifono o le fonotele, le Susuga i le Toeaina ia Dr. Leatulagi Fa'alevao, sa ta'ita'ia le sauniga o le fa'apaiaina o le galuega. Na saunoa foi le Afioga i le Fa'atonu o Galuega Lautele o le Malo, o Sina Voight, mo le tuuina atu o pepa o le Malo e fa'ataga ai le fale mo le fa'aogaina. O le Susuga i le Toeaina ia Falelua Lafitaga na saunoa i le tatalo e fa'apaiaina ai le galuega. A o le Failautusi o le Pulega, Susuga i le Feagaiga ia Leitualasa Malieitulusa FS, na saunoa i le tala o le galuega.

Amata le tala a le Failautusi mai le taimi na vaelua ai le Pulega Itu'au i le 2020, e fa'ataunuu ai le finagalo o le Iloiloga o le Faavae a le Ekalesia Aoao sa faia i le 2019. Na vavae ese ai le Ekalesia Petesa Uta, o Petesa Tai, o Ierusalem Fou, ma le Talalelei o le Faaolataga; ma latou amataina ai le pulega fou, o Tafa i Kanana Fou. A o le Ekalesia i Nuuuli, o Matuu & Faganeanea, Fagasa, ma Ma'ama'a; sa fa'aauuina pea le igoa o le Pulega Itu'au. Ina ua talanoaina le tulaga o le fale o le

pulega, sa tasi moemoe le finagalo o Tama o le Pulega Itu'au, o le a tuuina atu le fale o le pulega ma le pulega fou o Tafa i Kanana Fou, a o le Pulega Itu'au o le a alo atu i le fausiaina o se fale fou.

O le mae'a ai o le Fonotele 2021, na fa'asino ai e le Komiti o Feau Eseese le fanua i totonu o le 'aai o Kanana Fou e fausia ai le fale fou o le Pulega—i 'autafa o le fale o le Pulega Aukilani, a o luma mai o le fale ta'alo o le Taeaoafua o Tupulaga. Na amata muamua le galuega i le sailiga o le seleni, lea na maua ai le aofa'i e \$330,000 i le sailiga a le pulega. Ona saili lea o se Agaiotupu, lea na filifilia ai le tofa ia Atuatasi Seigafo ma lana konekarate o le "Quality Painting", e feagai ma le fausiaina o le fale. O le tofa ia Atuatasi Seigafo, o le tama fanau o le pulega, o le tiakono mai le Ekalesia EFKAS i Fagasa.

Saunoa le Failautusi o le Pulega, e \$295,000 le seleni sa tuu atu i 'aao o le Agaiotupu i le amataga e fa'atino ai le galuega, ma e o'o mai i le taimi nei, e pau lava lea o le tupe sa alu i le galuega. A ua iite lava le Toeaina ma le mamalu o le 'aufaigaluega a le Pulega, a silasila i le tulaga o le galuega aemaise le matagofie o ona teuteuga ma meafale, e le na o le \$295,000 le tau o le galuega. E tele mea ua fa'aopoopo e le Agaiotupu e lei iai i le ata o le galuega sa faataoto i le amataga. E le gata i meafale, aemaise le tele o isi fa'aopoopoga fou o le fale. O le mea lea e uma ai le agaga faafetai o le pulega i le tofa ia Atuatasi, ma lona agalelei i le pulega ma lenei galuega matagofie.

O le Afioga i le Ta'ita'ifono Dr. Leatulagi Fa'alevao FT na saunia le upu a le Atua e faafetaia ai le pulega mo lenei galuega lelei ua faia mo le Atua ma lana galuega. Saunoa le Ta'ita'ifono i le matagofie o le fale i le va'ai mai i fafo, ua na fa'atusaina i le Fale Pa'epa'e o loo alala ai le Peresetene o Amerika. O le fa'amalosi 'au a le Ta'ita'ifono i le Pulega, e 'auna ne'i galo le Atua ua mafua ai ona taunuu manuia le galuega. O le seleni ma le tamaoaga na fa'atino ai lenei galuega, o le pototo ma le atamai na tuuina i le Agaiotupu e fausia ai, aemaise le ola ma le malosi e fa'ataunuuina ai, o mea ia mai le Atua. E le tatau la ona galo le Atua i lenei galuega tele ua latou faia, a ia vivii ma fa'afetai ia te Ia. Na saunoa fa'amanuia foi le Ta'ita'ifono i le Susuga i le Toeaina ia Asiata Fouvale ma le Afioga i le Tiakono Toeaina ia Soli'ai Fuimaono ma le paia o le 'aufaigaluega, aemaise le mamalu o le Pulega Itu'au sa 'auai i le fa'amoemoe ma i latou o loo tapua'i mai i maota ma laoa, ona o le galuega lelei e pei ona tapenaina.

Ina ua mae'a le sauniga, ona ooti lea o le lipine o le fale ma ulufale atu le 'auvalaaulia e maimoa totonu o le fale. O le masiofo i le Afioga i le Kovana Sili ma le

Faletua o le Ta'ita'ifono, sa feagai ma le ootiina o le lipine. O se vaaiga ese na molimauina e le 'auvalaaulia ina ua ulufale ma maimoa i totonu o le fale. E ese foliga o lenei fale mai fale a isi pulega. E moni ai le saunoga a le Ta'ita'ifono i le taimi o le sauniga, ua pei o le Fale Pa'epa'e o loo alala ai le Peresetene o Amerika, e le gata i le matagofie o ona teuteuga i totonu, a o meafale o loo fa'atotoga ai le fale.

E 5 potu moe o le fale e tofua ma le fale ta'ele (5 master bedrooms), ua mae'a lelei foi ona teuteuina ma fa'atotoga. O le potu malolo e uiga ese foi lona telē. Tetele nofoa malolo e malolo ai le pulega ma ni malo e tali ai, fa'atasi ai ma isi teuteuga e masani ai fale papalagi i nei ona aso. E fa'apea foi le va'aiga i le umukuka ma le potu e fai ai taumafataga; ua mae'a lelei ona teuteuina ma fa'atotoga.

E le fa'atusatusaina le matagofie o le fale o le Pulega Itu'au mai fale a isi pulega o i totonu o le 'aai o Kanana Fou. Masalo ona o le 'ese o lona fausaga. Ua le mulimulita'i ai le pulega i le i'ugafono a le fonotele ina ia tutusa uma fausaga o fale o pulega i totonu o le 'aai o Kanana Fou. Peita'i, ua manino nei le 'auvalaaulia, o le 'ese o lona fausaga, ua mafua ai ona tulaga ese lona matagofie. Na saunoa le Failautusi i lana tala o le galuega, na o le \$295,000 le seleni a le Pulega na ave i le Agaiotupu e fau ai le fale. Peita'i, ina ua mae'a le maimoaga a le 'auvalaaulia ma latou va'aia le matagofie o teuteuga ma meafale sa fa'atotoga ai le fale, ua manatu ai nisi, e sili atu ma le \$500,000 le seleni na alu i lenei galuega.

Atonu o lenei galuega matagofie, ua aumaia ai e le Pulega Itu'au se lu'itau mo isi pulega aemaise le Ekalesia Aoao: e leai se tua'oi o mea lelei. E leai foi se tapulaa o galuega lelei e faia mo le Atua. E le tau-maute, o lenei galuega tele na fa'ama'ite i le naunau o le pulega e fa'atino lona suafa ua fai ma mitamitaga i le Susuga i le Toeaina ia Fouvale Asiata, fa'apea le Afioga i le Tiakono Toeaina ia Soli'ai T. Fuimaono ma le mamalu o le 'aufaigaluega: o le Pulega "Itu'au Malosi i mea tau i le Atua."

Ina ua mae'a le maimoaga, na se'e lea o le 'auvalaaulia i le fale ta'alo Taeaoafua o Tupulaga, na saunia ai e le pulega le taumafataga ma fa'aaloaloga masani. Ina ua mae'a fa'aaloaloga, o le Susuga i le Ta'ita'ifono o le Komiti a le 'Au Toeaina, le Susuga i le Toeaina ia Falelua Lafitaga, na saunoa e fa'afetaia le pulega ona o fa'aaloaloga ma teuteuga fa'aleaganuu, aemaise foi le tulaga o le galuega matagofie. Ina ua ta'ape le 'auvalaaulia, ona feiloai lea o le Pulega ma le Agaiotupu, le tofa ia Atuatasi Seigofo, ma sa faia ai fa'aaloaloga ma teuteuga e pei ona masani ai.

## Olaina o le So'otaga ma le Atua i ala Fa'aleaganuu

(*Cultural Spirituality*)

Saunia: Tony Hollister FT

### 1. Fa'atomuaga

O le so'otaga a le aganuu ma le lotu, e autu i le olaina o le so'otaga a le tagata ma le malosilili e le va'aia e mata, poo le Atua. O le olaina o le so'otaga, e fa'amatala e le faitau "e feuluulua'i" (*interconnected*)<sup>1</sup> e tusa o le manatu o Ivan Patovnyjak. E fesoota'i foi ma le lagonaina ai o le filemu ma le uiga o le avea ma tagata ola (*a sense of peace and purpose*).<sup>2</sup> O le so'otaga ma le Atua e fa'amatala e Walter Herelton i le fesoota'iga ma tala i le Tusi Paia (*Spirituality and Biblical Spirituality*). O le olaina i le fa'atuatua ia fa'aalia ai le ola pa'ia, o meaalofa a le agaga, o le ola i le agaga, ma le fa'atonutonu ai e le agaga.<sup>3</sup>

Na fa'apena fo'i le manatu o Elisabeth Scott. Peita'i, e aofia i le olaina, le soso'o atu o le tagata i isi tagata. Na fai ane ai Scott, o le olaina (*Spirituality*), o se vaaiga lautele i mea e maualuga atu i le tagata. E aofia ai ma talitonuga fa'alelotu i le malosilili, fa'apea le fesoota'iga o le tagata i isi tagata ma le atoa o le lalolagi.<sup>4</sup> O so'otaga fo'i nei, e fa'amamafaina ai uiga taua o le ola (*values*), ma le fa'aalia ai i le ola sosoo o tagata uiga o le ola mai le Atua (*purpose*), e tusa o le manatu o Paul Aquirre.<sup>5</sup>

O le feuluulua'i la, e pei ona ta'ua i luga, e fai ai le olaina o le sootaga ma le Atua, ma fua (*fruit*) o le lotu ma le aganuu, e tusa o le manatu o Platovnyjak. E fa'apena fo'i le aafia ai o le aganuu ma le lotu i le olaina e le tagata o lana sosoo atu i le Atua. O le so'otaga e manino i le fa'aalia ai o mea o le agaga. E felata'i le va'aiga lea ma le fefaasoa'i e pei ona fa'amatala e H. Margulies, o le "a'u ma le oe" (*I-thou dialogue*). O le fa'asoa e mafai ona fesoota'i ma le sootaga fa'aSamoa e igoa o le 'Va tapuia', i le fa'amatala ai o le olaina o le fa'atuatua i le Atua i le va fesoota'i o tagata Samoa.

A i ai la se eseese o le aganuu ma le lotu, o le eseese ona e eseese fa'atinoga o le sosoo atu o tagata ta'ito'atasi ma mafutaga i le malosilili, poo le Atua. O le eseese i lagona (*feelings*) ma talitonuga (*beliefs*).

<sup>1</sup> <https://bibliotekanauki.pl>, Ivan Patovnyjak S. J

<sup>2</sup> <https://au.reachout.com> - identity - spirituality

<sup>3</sup> <https://onlinelibrary.wiley.com> "Biblical Understanding of Spirituality." April 1963.

<sup>4</sup> <https://www.verywellmind.com> "What is Spirituality?" 2020

<sup>5</sup> <https://www.atoncenter.com> "The Three pillars of Human Spirituality", 2017

Peita'i, o sootaga e fa'ailoa tutusa i ala fa'aletapua'iga ma fa'aleaganuu, fa'apea uiga o le tagata, ma va'aiga lautele i le soifuaga. E fa'apena foi i le iloa o tusitusiga fa'aleagaga ma va'aiga pa'ia, ma a'oa'oga tau le Atua ma le ola o tagata, e tusa o le manatu o Patovnyjak.

## **2. Taua o le Agaga Paia i le olaina o le sootaga ma le Atua (Significance of the Holy Spirit in Spirituality)**

O le lotu i le fesoota'iga ma le Agaga i le olaina o lea so'otaga ma le malosilisi (Spirit and Spirituality), e fesoota'i ma le uiga o le lotu i le manatu o Rudolf Otto. E talia ma fa'atumau ai le so'otaga ma le Atua, i va'aiga loloto o le ola (attributes), o le agaga (Spirit), o le fetuutuuna'i tatau (reason), o le fa'amoe-moe i le ola (purpose), o moomooga lelei (good will), o le so'otaga ma le malosilisi (Supreme power), o le sosoo faatasi (unity), ma le fa'ataua ai o le ola (selfhood). O le avea ai foi lea o le lotu ma mafutaga e fa'aalia ai fetuutuunaiga mautu (rational religion).<sup>6</sup>

O inei fo'i e iloa ma mafai ai ona olaina talitonuga i fafo mai mafutaga fa'alelotu, e pei o aganuu. Peita'i, o le so'otaga ma le olaina e fa'asino i le agaga, ae le na o mea va'aia e pei o lotu ma talitonuga.<sup>7</sup> O le iloa loloto foi e maua ma fa'aalia i so'otaga fa'alemafutaga, fai mai Otto, e le pei o mataupu a'oa'oina. Peitai, o le lotu fa'agaetia e fafagua le mafaufau ina ia fa'amalamalamaina. Ma le isi, o mea a le agaga e le a'oa'oina, ae fafagu.<sup>8</sup>

O va'aiga la ma so'otaga fa'aleagaga, i le fesoota'iga ma le lotu ma le aganuu, e autu i le talia ai e le tasi o le isi, e pei ona autu ai le fesoota'i mai o le Agaga o le Atua. O tagata nei ua fesoota'i fa'atasi, ma ua fa'atasia ai ma le foafoaga, pei o upu a Galina Ermolina: *coexistence of humanity in a harmonic unity with nature.*

## **3. Olaina o le sootaga ma le Atua i ala fa'aleaganuu ma fa'alelotu**

O le vaeveaga e le alii o Richard Niebuhr le so'otaga a le aganuu ma le tala lelei a Iesu, i lana tusi "Keriso ma le Aganuu" (*Christ and Culture*), o loo i ai se va'aiga e fia fa'amamafa i le talanoaga: "O Keriso o le aganuu" (*Christ of Culture*). Ua fa'amamafa ai iinei le uluulu o le fesoota'iga o le aganuu ma le tala lelei a Iesu. E foliga fa'apea foi le manatu o Lalomilo Kamu, fai mai, o le aganuu o le mea alofa mai le Atua, na tuu fa'asolo mai e tuua e ala i tu ma aga tausisia. E faapena

fo'i se fesoota'iga ma le manatu o le alii foma'i faiaoga o Elekosi Lafitaga, "o loo i totonu o le fa'aSamoa, uiga o loo a'oa'oina i le Tusi Paia." [pepa i le faamanatuga o le 40 tausaga o le Kolisi Kanana Fou].

O le fesoota'iga lea o le aganuu ma le tala lelei ia Iesu, o loo atagia i a'oa'oga a le aposetolo o Paulo ia Korinito (1 Korinito 12:12). Fai mai, "Aua pei o le tino ua tasi ia, ma ona itutino e tele (eseese), a o itu tino uma, e ui ina tele (eseese), o le tino e tasi lava ia, e fa'apea lava Keriso." E pei o upu a le Aposetolo o le manatu, "e le punitia e le isi fetu, le pupula o le isi fetu." E tumau ai le eseese o itu tino. Peita'i, o le eseese o loo fau ai le tasi o le tino atoa. E fa'apena le aganuu ma le tala lelei fa'amatalatalaina. E eseese ae sosoo fa'atasi i le Keriso.

O le tasi foi lea e pei ona fa'amatala e Paulo (1 Korinito 5:17). Fai mai, "...o le ua ia Keriso o le tagata fou ia." O le tasi e ta'ele i le tagata ua ia Keriso. O le i ai ia Keriso e utufia ai le tagata e le mana o le Agaga Paia. E ui ai ina to'atele tagata eseese i mafutaga, e pei o vaega eseese o le tino, ae ua tino e tasi ia Keriso. E ui foi i lea tino e tasi ia Keriso, peita'i, e i ai pea feteena'iga i mafutaga, ma foliga mai ai e leaga aganuu ma mafutaga fa'alelotu. Peita'i, o va'aiga e tau i le mavaevae, ona o le tagata ua fa'asili lona lelei fa'apito, i le ola fa'aleaganuu ma fa'alelotu.

O loo va'aia fo'i feteena'iga nei i tala i le Tusi Paia. Na fai ane ai Schneiders i lana tusi "Revelatory Text", o loo fa'asilisili le tulaga o alii ae ua fa'atuatua'ia tina ma tama'ita'i i nisi tala i le Tusi Paia. O tala ua foliga tauaso ai le tusi tala, i saisaitiaga o tina ma tama'ita'i i mafutaga a tagata Isaraelu ma le ulua'i ekalesia.<sup>9</sup> O le taotaomaga ona ua pulea tala e va'aiga fa'aletagata o le eseese i ala fa'aleaganuu ma fa'alelotu.

## **4. O le ola taotaomia ma faasa'oloto i tala i le Tusi Paia**

O le ola taotaomia, o le la'asaga o le ola e feteena'i ma le uiga o le finagalo o le Atua mo tagata ta'ito'atasi ma mafutaga. Peita'i, o le fesoota'iga o tala i le Tusi Paia ma aganuu e tusa o tala, ua foliga taotaomia ai nisi vaega o tagata i tala. O le ola taotaomia e pei ona ta'ua ai "aaua tina ma auauna alii" i le Tulafono e fa (Esoto 20: 8-11), ma le Tulafono e sefulu (Esoto 20:17), i le lisi o Tulafono e sefulu, na tu'uina ifo i le nuu o Isaraelu, e ala ia Mose.

O Tulafono e fa'asino i vaega eseese o tagata i le mafutaga a le nuu o Isaraelu. O vaega e aofia ai ma auauna poo latou e gafa ma faiva fa'atautua i aiga. O

<sup>6</sup> Rudolf Otto, trans. By John W. Harvey, *The Idea of the Holy*, Oxford University Press, New York, 1950, 2nd edition), p. 1

<sup>7</sup> *ibid.*, p.7

<sup>8</sup> Waller Herelton, "Biblical Understanding of Spirituality"

<sup>9</sup> Sandra M. *The Revelatory*, (San Francisco: Harper Collins Publishers, 1991), pp. 181, 182.



faiva fo'i e le fesoota'i ma le ola taotaomia, e pei ona saisaitia ai le vaega lea i le tele o mafutaga, ona o lagona fiafa'amalie o vaega ta'u malolosi i le mafutaga fa'alenu'u a Isaraelu.

O le fa'amoemoe la mo le fo'ia o le taotaomia ai o le ola i tala mai le Tusi Paia, ia fa'amamafa le malosi faasa'oloto mai tala. E tusa poo foliga pulea tala i va'aiga taotaomia fa'aletagata. E fa'amamafa ai le ola sa'oloto o vaega uma o tagata (alii ma tamaita'i faapea lanu ma gagana) i le fa'auigaina o tala, i ala fa'aleaganuu ua fa'aalia ai le tala lelei i le Keriso i ai i le aganuu.

O le fa'asaolotoga e tusa o le manatu o Schneiders ina ua le saisaitia tina ma tama'ita'i fa'apea le 'au vai-vai ma le foafoaga, mai le pulea ai o tala e le malie fa'apito fa'aletagata. O saisaitiaga foi ina ua fa'amalosia aganuu mai le si'osi'omaga o tusi tala, i luga o le ola o tagata faitau ma su'esu'e i tala. O le fa'amoemoe fo'i mo lea fa'asaolotoga i mafuaga fa'alelotu (ma fa'aleaganuu), ia liliu le va'ai a tagata mai le piitia ai o faiga saisaitia ai tina ma tamaita'i i aiga ma fa'alapototoga eseese.<sup>10</sup>

### **5. Malosi fa'amafutaga osi o le aganuu mo le ola fa'akerisiano**

O le atoa o le fa'auigaga o tala mai le Tusi Paia, e tino ina ua fesoota'i le uiga o tala ma le ola o tagata faitau. E fesoota'i le va'aiga lea ma le manatu o Kamu, e fa'asino i le feteena'iga o le uiga o tala ma le mea o loo ola ai le tagata. O feteena'iga ona ua le fesoota'i le fa'auigaga o tala ma le ola o tagata faitau (*faulty interpretations and erroneous perceptions*).<sup>11</sup> O fa'aaliga fo'i o le malosi fa'aola, fa'amalolo, ma puipui o le Agaga, e talitonu tagata Samoa, a o lei taunuu mai le Tala Lelei ia Iesu i le va'ai fa'aMisionare Europa, na fa'aalia lava i tala tuu ma tala fa'afagogo a Samoa.

O faiga fo'i fa'aleatunuu ma ona tala, e i ai ona foliga le atoatoa ona e fesoota'i ma tagata e le atoatoa, e pei ona fa'aailoa ai le tala o le pa'u o le Ulua'i tagata (Kenese 3). Peita'i, na fa'atonutonu ma puipuia mai le pulea e le vaivai fa'aletagata, e le tala lelei ia lesu fa'aalia ai le Atua ma lona alofa fa'aola.

O va'aiga fa'amamafaina nei na fa'asino i ai manatu mai le tusi a Niebuhr na talanoaina i luga. Ua fa'aailoa ai le taua o le aganuu, pei fo'i o le lotu i mafutaga, aemaise le fa'aailoa ai o le avea ma tagata ola fai e le Atua. Peitai, e le mafai ona aveesea le lualuagia ai o le ola o tagata pulea e suiga, ma le taumafai ai o nisi e fa'aaoga aganuu lofia i suiga, mo lo latou malie

Fa'apito. O va'aiga to'ilalo nei ua tatau ai le vaega a le lotu (poo le lotu Kerisiano) e ta'ele i ala o Keriso. E fa'apena fo'i, i le matua toe sailiili loloto i le taua o le aganuu, e pei o le fa'aSamoa, ina ia iloa ma lagona ai fa'aailga o le mana fa'aola o le Atua.

### **6. Tala i le Tusi Paia fai ma malosi liliu mo le ola (Biblical text/s for spiritual transformation)**

O le aganuu e leai sona fua fa'ataoto i fafo atu o le ola o le tagata. E pei o se mea a leaga ona va'ai lea o le fua, e toe fa'atulaga ai se fausaga fou. Peita'i, o le aganuu lava ia, e lelei ona o le vaega o le ola o le tagata foafoa e le Atua. O le fua fo'i o le Atua. O le ola ai o tagata i le aganuu, e iloa ai lona avea ma tagata ola e tusa o le foafoa ai e le Atua. A foliga leaga la le ola o tagata, e le ona o le aganuu, a o le tagata pulea e le leaga (leaga e pei ona lofia ai le tagata i le amataga e tusa o le tala a le Kenese 3). Ua milosia ai le aganuu lelei e lagona ma fa'atinoga a le tagata pulea e le leaga.

O le lelei sailia la mo le ola ua leaga, e le o le aganuu a o le tagata pulea e le leaga, ia fa'aleleia e le malosi fa'afou o le Atua. O le malosi o loo ta'ele ai mafutaga fa'alelotu fa'apea faiga fa'aleaganuu. O le tagata ia fai ma tagata fou ia Keriso, e pei o upu a Paulo (2Kori5: 17), "...afai o ia Keriso se tasi, o le tagata fou ia; ua mavae le ola tuai, faauta, ua o mai le ola fou."

E foliga fa'apea fo'i le uiga o upu a le Aposetolo ia Roma mataupu e 4. Na fai ane ai le faifeau faiaoga, o Elekosi Lafitaga i lana pepa e pei ona taua i luga, o loo fa'amamafa ai se toe iloiloga o le aganuu ina ia o fa'atasi ma ala o le Alii. O le iloiloga, ou te manatu, e ta'ele i le malosi fafagu o le Agaga Paia, e pei o le manatu o R. Otto, o loo taua i le vaega i luga o le pepa.

E fa'apei ai ona fou le tagata ua ia Keriso, e pei o la le Aposetolo, e fa'apena le tagata ua iloa fa'aaliga o le fou o le Keriso totonu o lana aganuu ma le lotu, ma ola ai. O le fou e pei o le fa'aailaga o le "matau" poo le "pa" mo faiva a tautai Samoa, i le 'ana' ma le 'puga'. E sau ai le alagaupu, "E a le puga nisi ae a le ana nisi." E pei ai le aganuu o le 'puga', a o le lotu o le 'ana', ina ia fa'aalia ai le ola fou mai le Alii o Iesu mo le 'au Kerisiano, e pei o le pa iila. O le ola fou na fa'aalia ma tau i le atoatoa o le ola lavea'i mai le leaga i le soifua o le Alii o lesu.

### **7. Upu Faai'u**

Mai le fafagua ma fa'aloloto o le ola mai le aganuu ma le lotu ua i ai Keriso, e pei o le pa fagota ua lelei ona saunia i le 'puga' ma le 'ana'. O iina e tafe mai ai le mana fa'aola ma lavea'i o le Atua mo tagata Samoa ma le Pasefika. E pei fo'i ona fou le ola ua ia Keriso, e pei o la Paulo, e fa'apena le tagata ua lagona ma olaina

<sup>10</sup> Schneiders, p. 182.

<sup>11</sup> Lalomilo Kamu, "The Samoan Culture and the Christian Gospel," (Apia Western Samoa: Donna Lou Kamu. 1996).

le so'otaga ma le Alii i ala fa'aleaganuu ma le lotu. O lona uiga, o le ola ai o tagata Samoa ma le Pasefika i le ala fa'aleaganuu ma fa'alelotu i ai Keriso, e fa'aaau ai le lagonaina ma le sosoo ai fa'aleauuso i le ola fou mai le Ali. E fa'apena i le fa'auigaina o tala mai le Tusi Paia. E fa'aaoga ai ala fa'aleaganuu ma a'oa'oga fa'alelotu ua i ai Keriso e fa'atino ai. O le faiga e tau i le avea ai o tala ma vaega o le ola o tagata Samoa, aemaise le ola ai i le fou o le ola ia Keriso.

Ia manuia le fefaasoa'i e pei ona fa'asoa mai le Alii i lena vaitau o le Kerisimasi ma le aga atu i le tausaga fou. Tony Hollister FT

\*\*\*\*\*

## FA'ASOLOGA FONOTAGA KOMITI TUMAU - Ianuari 2024

E faia lena fa'asilasilaga i le ava tele, e toe fa'amanatu atu ai le fa'asologa o fonotaga a Komiti Tumu ia Ianuari 2024. Mo le silafia, na o le Komiti a le 'Au Toeaina e malaga mai i Samoa mo fonotaga ia Ianuari, talu ai lo latou mafutaga ma le 'Au Toeaina EFKS. A o isi Komiti Tumu, aemaise o sui mai Matagaluega i fafo, o le a faia a outou fonotaga i luga o le zoom. Sau se taimi ona fa'aoo atu lea o le "link" e ala i le imeli, tou te fesootai mai ai. O le fa'asologa lea o fonotaga a Komiti ia Ianuari 2024:

1. Komiti a le 'Au Toeaina: Ianuari 16-18, 2024
2. Komiti Fa'amisionare: Ianuari 23
3. Komiti o Feau Esee: Ianuari 24
4. Komiti o Tupe: Ianuari 25
5. Komiti o Aoga: Ianuari 29
6. Komiti o Atina'e: Ianuari 30

Mafutaga 'Au Toeaina EFKAS & EFKS: **Ianuari 19-22**  
Fono Iloiloga l'ugafono Tumu: **Ianuari 31**  
(Failautusi o Matagaluega uma EFKAS)

A i ai ni suiga o lena fa'asologa, o le a vave logo atu sui o Komiti e ala i le imeli.

Ma le fa'aaloalo lava,

Nafatali Falealii FS  
Failautusi Aoa EFKAS

## Tala Pu'upu'u – "O Ai le Atua?"

Na tu'u atu e le faiaoga le avanoa i tamaiti o le Vasega Tolu e tusi mai se tala e tali ai le fesili, "O ai le Atua?" O le fa'amatalaga lena a se tasi o tama'ititi o lena Vasega:

"O le galuega muamua a le Atua sa fai, o le faia o le tagata. E fai tagata fou e sui ai e ua feoti, ina ia lava pea tagata o le lalolagi. E le faia e le Atua ni tagata matutua leaga e tele le taimi e alu ai, ae lelei pepe e la'ititi le taimi e fai ai. Ona tu'u lea o pepe, faitalia o latou matua ma a'oa'o e savavali ma tautala, leaga e tele fo'i le taimi o le Atua e alu e a'oa'o ai."

"O le galuega a le Atua e soso'o ai, o le fa'alogo mai i tatalo. Tele taimi o le Atua e alu ai aua o isi tagata e tatalo so'o, e le na o le po e tatalo ai pe a momoe, ae tatalo fo'i i le ao. Ua leai se taimi o le Atua e alu e matamata ai i le TV pe fa'alologo i le leitio. E lagona e le Atua mea uma. 'Ai lava se tele o le pisa e oo i taliga o le Atua, vagana e i ai sana aualea e ki ese ai."

"O Iesu o le Atali'i o le Atua. Sa masani ona fai e ia galuega faigata pei o le savali i luga o le vai, fai vavega, ma lauga atu i tagata e le fia iloa le Atua. Fiu loa le vaega e fa'alogo i lauga a Iesu, tago loa fa'asatauro. Ae ona o Iesu e lelei, fai loa i lona Tamā e fa'amagalo leaga latou te le iloa le latou mea ua fai. Fai mai loa le Atua ua lelei. Ua fiafia tele le Atua i galuega a Iesu ia na fai i le lalolagi, fai loa i ai, e te le toe alu ifo i le lalolagi ae o le a nofo i ona tafatafa i le lagi."

"O le galuega ia a Iesu lae fai, o le fesoasoani i lona Tama e fa'alogo mai i tatalo ma va'ai mea taua e fai ia lelei mo lona Tamā. E tele fo'i mea e fai lava e Iesu ia lelei, e le tau tu'u i le Atua, e pisi fo'i le Atua ia. Tatalo lava i so'o se taimi, ua uma lava ona fuafua e le Atua ma Iesu, po o ai e fa'alogo mai i lea taimi ma lea taimi." "

E tatau ona e alu i le lotu i le Aso Sa e fiafia mai ai le Atua, a i ai lava se isi e tatau ona fiafia mai ia oe, o le Atua. Aua nei tu'u le lotu ae alu i le beach. Aua muamua i le lotu aua fa'atoa lelei le susulu o le la i le beach i le aoauli. Aua nei e pei o le au le talitonu, o le le fiafia ia i lo latou olaga. O le isi mea, e i ai isi mea e le mafai ona i ai ou matua e pei o le mea pogisa, pe te pa'u i se mea loloto, ae i ai lava le Atua. Aua se'iloga o mea e te mana'o ai ona manatua lea o le Atua. O le Atua na tu'uina a'u iinei, na te toe aveese fo'i a'u, pe a mana'o ai. Pau ia o mea ou te iloa i le Atua."

Ia manuia le Tausaga Fou!

## Lisi o le 'Aufaigaluega Agavaa mo le Galuega Tausi 'Aulotu

O le lisi leni o le 'aufaigaluega i Faifeau ma A'oa'o Kanana Fou o loo avanoa ma agavaa mo le galuega tausī 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau saili ni o latou feagaiga. O suafa ia, e le gata o le 'aufaigaluega o loo galulue nei mo le Ekalesia Aoao i Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoao i le imeli: [gensec@efkasonline.org](mailto:gensec@efkasonline.org), e fa'alauiloa ai lou suafa i le taimi e toe lolomia ai le Lamepa.

### **Kolisi Faafaifeau Kanana Fou:**

Dr. Moreli Niuatoa FS, *Peresetene*  
 Dr. Simi Mauga FS, *Sui Peresetene*  
 Sasa Sotoa FS, *Teutupe Kolisi*  
 (fa'amaonia e le 'Au Toeaina)

### **Ofisa Failautusi Aoao**

Paulo Lealaitafea FS  
 Raynold Tagoa'i AKF

### **Ofisa A'oa'oga Kerisiano:**

Setefano P. Lefale FS, *Fa'atonu*  
 Vili Polikapo FS  
 Simeona Ape AKF  
 Penani Lefaoeseu AKF

### **Ofisa Lamepa**

Tamilo Palepua AKF

### **Aoga Maualuga Kanana Fou**

Veteran Brown AKF

### **Pulega Fale-Ta'u:**

Ioane Ioane FS (Fitiuta)

### **Pulega Sua:**

Ioane Peleti FS (Fagaitua)  
 Waiana Tanielu FS (Masausi)  
 King Talamoni FS (Amaua)  
 Simeona Ape AKF (Laulii)  
 Reynold Tagoa'i AKF (Laulii)  
 Magaga Talo AKF (Masefau)

### **Pulega Sa'ole:**

Setefano P. Lefale FS (Auasi)  
 Vili Polikapo FS (Amouli)  
 Edward Semaia FS (Aunuu)  
 Siavao Iese FS (Alofau)  
 Pou Tauaa FS (Alofau)

### **Pulega Fagalao:**

Tumau Petaia FS (Fagaalu)  
 Poutoa Leituala FS (Pago Pago)  
 Tamilo Palepua AKF (Pago Pago)

### **Pulega Itu'au**

Paulo Lealaitafea FS (Nuuuli)  
 Tavita Mailoto FS (Ma'ama'a)  
 Al Luavasa Tunupopo FS (Fagasa)  
 Isaako Matautua Jr FS (Fagasa)  
 Vagana Saili FS (Matuu & Faganeanea)

### **Pulega Tualatai:**

Uaea Satele FS (Vailoatai)  
 Daru Ulutu FS (Malaeloa)  
 Sinaka Ulutu FS (Malaeloa)  
 Amaamalele Tofaeono FS (Taputimu)  
 Pelesi Tanuvasa FS (Taputimu)

### **Pulega Alataua:**

Rossetti Faamausili FS (Nua Seetaga)  
 Tasele Tuigamala FS (Leone)  
 Soosoo Tuiolemotu FS (Poloa)

### **Pulega Tualauta:**

Folauga Tupuola FS (Iliili)  
 Penani Lefaoeseu AKF (Faleniu)  
 Veteran Brown AKF (Iliili)

### **Pulega San Francisco:**

Moegagogo Tamasese FS  
 Eliu Eseroma FS (Daly City)  
 Ketesemane Tagalao FS (Sacramento)  
 Peter Fualaau FS (Sacramento)  
 Vaise Poloka AKF (Sacramento)  
 Euta Asifoa AKF (Oakland)

### **Pulega Seattle:**

Talosaga Patea FS (Seattle IV)

### **Pulega Santa Clara:**

Vai Malaulu FS (Tafatolu)

### **Pulega LA Matu:**

Sugalu Filivaa AKF (Ola Fou LB1)  
 Malaki Tauiliili FS (Ola Fou LB1)  
 Samuelu Tialavea FS (FOLA)  
 Emosi Liaina FS (Ola Fou LB1)

### **Pulega LA Saute:**

Timoteo Young FS (Etena Fou)  
 Mose Mose FS (USC)

### **Pulega Alaska i Matu:**

Poasa Maui FS (Faavae Fou)

### **Pulega Alaska i Saute:**

Tomasi Foilefutu AKF (Feagaiga Fou)

### **Pulega Aukilani:**

Tautalaaso Asiata FS (Ranui)  
 Faiagaga Leota AKF (Wiri)  
 Iulio Pati AKF (Wiri)

## Lisi o 'Aulotu Avanoa

O nisi ia o 'aulotu o le EFKAS ua avanoa i le taimi na lolomi ai leni Lamepa,  
 o le a aogā ai leni lisi e saili ai so latou faifeau:

- EFKAS Vaitogi